



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ ԹԻՎ 1 ԴԱՏԱԿԱՆ ԿԱԶՄԻ  
Ո Ր Ո Շ ՈՒ Մ Ը

---

ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՀԱՐՑԻ ՎԵՐԱԲԵՐՅԱԼ

Քաղ. Երևան

18 փետրվարի 2016թ.

Հայաստանի Հանրապետության սահմանադրական դատարանի  
թիվ 1 դատական կազմը՝

Նախագահությամբ՝ Ա. Թունյանի

Անդամակցությամբ՝ Ֆ. Թոխյանի

Ա. Պետրոսյանի

Քննության առնելով «ՎՏԲ-Հայաստան Բանկ» ՓԲԸ-ի անհատական դիմումի  
ընդունելիության հարցը,

**Պ Ա Ր Զ Ե Ց .**

Համաձայն ՀՀ Սահմանադրության 101-րդ հոդվածի 1-ին մասի 6-րդ կետի՝  
«ՎՏԲ-Հայաստան Բանկ» ՓԲԸ-ն դիմել է ՀՀ սահմանադրական դատարան (դիմումը ՀՀ  
սահմանադրական դատարան է մուտքագրվել 2016 թվականի հունվարի 29-ին)՝  
խնդրելով.

1) «Առևտրային արբիտրաժի մասին» ՀՀ օրենքի (այսուհետ՝ Օրենք) 24-րդ  
հոդվածի 1-ին մասի՝ Վերաքննիչ դատարանի կողմից թիվ ԵԿԴ/0109/17/15  
քաղաքացիական գործով մեկնաբանությամբ կիրառումը (դատական պրակտիկան)  
ճանաչել 2005 թվականի խմբագրությամբ ՀՀ Սահմանադրության 8-րդ հոդվածի 2-րդ  
մասի, 33.1-րդ հոդվածի 1-ին մասի և 42-րդ հոդվածի 2-րդ մասի դրույթներին հակասող.

2) ՀՀ քաղաքացիական դատավարության օրենսգրքի (այսուհետ՝ Օրենսգրք) 144-րդ հոդվածի 1<sup>1</sup>-րդ մասի և 205-րդ հոդվածի 1-ին մասի և «Առևտրային արբիտրաժի մասին» ՀՀ օրենքի 34-րդ հոդվածի դրույթների՝ Վերաքննիչ դատարանի կողմից թիվ ԵԿԴ/0109/17/15 քաղաքացիական գործով մեկնաբանությամբ կիրառումը (դատական պրակտիկան) ճանաչել 2005 թվականի խմբագրությամբ ՀՀ Սահմանադրության 19-րդ հոդվածի 1-ին մասի դրույթին հակասող, կամ՝

3) ՀՀ քաղաքացիական դատավարության օրենսգրքի 144-րդ հոդվածի 1<sup>1</sup>-րդ մասում և 205-րդ հոդվածի 1-ին մասում առկա օրենքի բացը ճանաչել ՀՀ Սահմանադրության 19-րդ հոդվածի 1-ին մասի դրույթներին հակասող այնքանով, որքանով որ նշված իրավանորմերը կոնկրետ և հստակ չեն սահմանում որոշումների բողոքարկման անհնարինությունը և իրավակիրառ պրակտիկայում այդ անհնարինությունը չի ապահովվում:

1. Ըստ դիմողի՝ Վերաքննիչ դատարանի կողմից Օրենքի 24-րդ հոդվածի 1-ին մասին տրված մեկնաբանությունը խոչընդոտ է հանդիսանում արբիտրաժային վարույթում կողմերի՝ վեճի լուծման ընթացակարգն ընտրելու իրավունքի իրացման համար՝ հանգեցնելով արբիտրաժային վարույթում կամքի ինքնավարության և պայմանագրի ազատության սկզբունքների գործողության անիրավաչափ սահմանափակմանը, ինչն էլ նշանակում է, որ հիշյալ մեկնաբանությամբ դատական պրակտիկան ուղղակիորեն հակասության մեջ է մտնում ՀՀ Սահմանադրության 8-րդ հոդվածի 2-րդ մասի, 33.1-րդ հոդվածի 1-ին մասի և 42-րդ հոդվածի 2-րդ մասի դրույթների հետ:

Դիմողը նշում է, որ օրենսդրությամբ նախատեսված չէ արբիտրաժային տրիբունալի վճռի ճանաչման և կատարողական թերթ տալու, ինչպես նաև այն չեղյալ ճանաչելու մասին առաջին աստիճանի ընդհանուր իրավասության դատարանի որոշումների բողոքարկման հնարավորություն: Իսկ վերաքննիչ դատարանի կողմից նշյալ որոշման դեմ վերաքննիչ բողոքը վարույթ ընդունելը նշանակում է, որ այդ որոշումները կարող են բողոքարկվել: Նման դատական պրակտիկան հակասում է Սահմանադրության 19-րդ հոդվածի 1-ին մասի դրույթներին, խախտվում է, մասնավորապես, ողջամիտ ժամկետում գործի քննության իրավունքը:

Դիմողի կարծիքով՝ ՀՀ քաղաքացիական դատավարության օրենսգրքի 144-րդ հոդվածի 1<sup>1</sup>-րդ մասը և 205-րդ հոդվածի 1-ին մասն այնքանով, որքանով կոնկրետ և

հստակ չեն սահմանում արբիտրաժային տրիբունալի վճիռները չեղյալ ճանաչելու մասին առաջին ատյանի ընդհանուր իրավասության դատարանի որոշումների բողոքարկման անհնարինությունը, պարունակում են օրենքի բաց, որը հանգեցնում է արբիտրաժային վարույթի մասնակիցների ողջամիտ ժամկետում իրենց գործի քննության իրավունքի խախտմանը:

2. Ղեկավարվելով «Սահմանադրական դատարանի մասին» ՀՀ օրենքի 32 և 69-րդ հոդվածների պահանջներով եւ ելնելով խնդրո առարկա անհատական դիմումի եւ կից փաստաթղթերի նախնական ուսումնասիրության արդյունքներից՝ դիմումի հիման վրա գործի քննության ընդունումը սահմանադրական դատարանի կողմից ենթակա է մերժման՝ հետեւյալ պատճառաբանությամբ.

**«Առևտրային արբիտրաժի մասին» ՀՀ օրենքի 24-րդ հոդվածի 1-ին մասի վերաբերյալ**

Նշյալ դրույթի մասով դիմողը բարձրացրել է դրա կիրառման իրավաչափության հարց:

Դիմումին կից ներկայացված դատական ակտերի ուսումնասիրությունը վկայում է, որ ընդհանուր իրավասության դատարաններից ոչ մեկը որևէ կերպ չի մեկնաբանել խնդրո առարկա հոդվածը: Այսպես, առաջին ատյանի դատարանը, վկայակոչելով ՀՀ Սահմանադրությունը և «Իրավական ակտերի մասին» ՀՀ օրենքի 24-րդ հոդվածը՝ արձանագրել է, որ «իրավական ակտի գերակայության սկզբունքի հիմքով կիրառելի է ոչ թե Ֆինանսական արբիտրաժային դատարանի Կանոնակարգի 22.2. կետը, այլ «Առևտրային արբիտրաժի մասին» ՀՀ օրենքի 24-րդ հոդվածի 1-ին մասը, որը հղում է կատարել կողմերի միջև կնքված արբիտրաժային համաձայնությանը և սահմանել է այն բացառիկ դեպքը, երբ կողմերը պարտավորվել են չիրականացնել բանավոր լուումներ»: Իսկ ՀՀ վերաքննիչ դատարանն իրավական դիրքորոշումներ է արտահայտել Ֆինանսական արբիտրաժային դատարանի **Կանոնակարգի 22.2.** կետի վերաբերյալ՝ արձանագրելով, մասնավորապես, որ «նշյալ կետի ձևակերպումից երևում է, որ Արբիտրաժը ոչ թե որոշում է բանավոր լուումների միջոցով իրականացնել արբիտրաժային վարույթը, ինչը միանգամայն կհակասեր արբիտրաժային համաձայնությանը, այլ որոշել է իրականացնել նաև բանավոր լուումներ՝ այն հիմնավորմամբ, որ ներկայացված նյութերը բավարար չեն եղել վեճն ըստ էության լուծելու համար: Ինքնին հասկանալի է, որ սույն

պարագայում «նաև բանավոր լսումներ» եզրույթը վերաբերում է գրավոր ընթացակարգով իրականացվող քննությանը, հետևաբար, սույն պարագայում այն չի կարող մեկնաբանվել այն իմաստով, որ Արբիտրաժը իրականացրել է միայն բանավոր լսումներ և խախտել է վեճի լուծման գրավոր ընթացակարգը»:

Կարծում ենք, որ դիմողի համար առաջացած անբարենպաստ հետևանքները նրա նկատմամբ կայացված համապատասխան դատական ակտերի արդյունք են, հետևաբար, խնդրո առարկա դրույթի սահմանադրականությունը վիճարկելով՝ դիմողն ընդամենը բարձրացնում է դրա **կիրառման իրավաչափության հարց**՝ փորձելով այն քողարկել խնդրո առարկա դրույթների հակասահմանադրականության վիճարկմամբ: Համաձայն ՀՀ սահմանադրական դատարանի՝ 17.03.2009թ. ՄԴԱՌ-21 որոշմամբ արտահայտած իրավական դիրքորոշման՝ բոլոր այն դեպքերում, երբ դիմողը ձեռնկանորեն վիճարկելով օրենքի դրույթի սահմանադրականության հարց, ըստ էության բարձրացնում է այդ դրույթի կիրառման իրավաչափության հարց, ապա այդպիսի դիմումները ենթակա են մերժման՝ «Սահմանադրական դատարանի մասին» ՀՀ օրենքի 32-րդ հոդվածի 1-ին կետի հիմքով:

**ՀՀ քաղաքացիական դատավարության օրենսգրքի 144-րդ հոդվածի 1<sup>1</sup>-րդ մասի, 205-րդ հոդվածի 1-ին մասի, «Առևտրային արբիտրաժի մասին» ՀՀ օրենքի 34-րդ հոդվածի 2-րդ մասի 1-ին կետի դ) պարբերության վերաբերյալ**

Նշյալ դրույթների ենթադրյալ հակասահմանադրականությունը դիմողը փորձել է հիմնավորել 2005 թվականի խմբագրությամբ Սահմանադրության 19-րդ հոդվածի հետ պատճառահետևանքային կապի համատեքստում՝ նշելով, մասնավորապես, որ խախտվել է ողջամիտ ժամկետներում գործի քննության իրավունքը: ՀՀ քաղաքացիական դատավարության օրենսգրքի համապատասխան նորմերը վերաբերում են, մասնավորապես, առանձին ակտի տեսքով կայացվող, ՀՀ քաղաքացիական դատավարության օրենսգրքով կամ այլ օրենքներով նախատեսված դեպքերում բողոքարկման ենթակա որոշումներին (հոդված 144.1<sup>1</sup>) և վերաքննիչ բողոք բերելու իրավունք ունեցող սուբյեկտներին (հոդված 205):

Ինչ վերաբերում է Օրենքի 34-րդ հոդվածի 2-րդ մասի 1-ին կետի դ) պարբերությանը, ապա այն սահմանում է այն հիմքը, որի առկայության պարագայում իրավասու դատարանը կարող է չեղյալ ճանաչել Արբիտրաժային տրիբունալի վճիռը:

Դիմումում ներկայացված փաստաթղթերն առ այն, որ այս դրույթները խոչընդոտում են ողջամիտ ժամկետներում գործի քննության իրավունքին, ակնհայտ անհիմն են, քանի որ Արբիտրաժային տրիբունալի կողմից վեճերի լուծման արագությունը պայմանավորված է առաջին հերթին արբիտրաժային վարույթի արագությամբ:

«Սահմանադրական դատարանի մասին» ՀՀ օրենքի 69-րդ հոդվածի 4-րդ մասը՝ որպես անհատական դիմումի ընդունելիության պարտադիր պայման, սահմանում է, որ դիմումը պետք է պարունակի ՀՀ Սահմանադրությանը հակասելու հիմնավորումներ: Այս համատեքստում ՀՀ սահմանադրական դատարանն իր ՍԴՈ-839 որոշման մեջ դիրքորոշում է արտահայտել առ այն, որ «Սահմանադրական դատարանի մասին» ՀՀ օրենքի 69-րդ հոդվածի 4-րդ մասն ամրագրում է վիճարկվող դրույթի՝ Սահմանադրությանը հակասելու հիմնավորումներ ներկայացնելու՝ դիմողին ներկայացվող պահանջը, համաձայն որի՝ վիճարկվող օրենքի դրույթի հակասահմանադրականությունը պետք է հիմնավորված լինի օրենքի 68-րդ հոդվածի 7-րդ մասում նշված որևէ հատկանիշով: Դիմումի ուսումնասիրությունը վկայում է, որ առկա չէ օրենքի 68-րդ հոդվածի 7-րդ մասով պայմանավորված խնդրո առարկա դրույթի ենթադրյալ հակասահմանադրականության բավարար հիմնավորում:

**«Առևտրային արբիտրաժի մասին» ՀՀ օրենքի 34-րդ հոդվածի 1-ին մասի, 2-րդ մասի (բացառությամբ 2-րդ մասի 1-ին կետի դ) պարբերության), 3-րդ և 4-րդ մասերի վերաբերյալ**

Դիմումին կից ներկայացված դատական ակտերի ուսումնասիրությունը վկայում է, որ **նշյալ դրույթները չեն կիրառվել դիմողի նկատմամբ:**

ՀՀ Սահմանադրության 101-րդ հոդվածն օրենքին է վերապահել սահմանադրական դատարան դիմելու կարգի սահմանումը: Այդ հոդվածի 1-ին մասի 6-րդ կետն իր կոնկրետացումն է ստացել «Սահմանադրական դատարանի մասին» ՀՀ օրենքի 69-րդ հոդվածի 1-ին մասում, որը սահմանել է ֆիզիկական և իրավաբանական անձանց դիմումների ընդունելիության պայմանները: Դիմում կարող է ներկայացնել այն ֆիզիկական կամ իրավաբանական անձը,

- որը հանդիսացել է ընդհանուր իրավասության կամ մասնագիտացված դատարաններում դատավարության մասնակից,

• որի նկատմամբ ընդհանուր իրավասության կամ մասնագիտացված դատարանի կողմից կիրառվել է որևէ օրենքի դրույթ,

• որի նկատմամբ վիճարկվող դրույթը կիրառվել է գործը լուծող վերջնական դատական ակտով,

• որը սպառել է դատական պաշտպանության բոլոր միջոցները:

«Սահմանադրական դատարանի մասին» ՀՀ օրենքի 69-րդ հոդվածի 1-ին մասում նշված որևէ պայմանի բացակայության դեպքում անհատական դիմում ներկայացրած ֆիզիկական կամ իրավաբանական անձը սահմանադրական դատարան դիմելու համար **իրավասու սուբյեկտ չէ:**

Հարկ է նշել նաև, որ դիմողը, վիճարկելով Օրենքի և Օրենսգրքի համապատասխան դրույթները, հղում է կատարում ՀՀ Սահմանադրության` 2005 թվականի փոփոխություններով խմբագրությամբ հոդվածներին, հաշվի չառնելով, որ 2015 թվականի դեկտեմբերի 22-ից ուժի մեջ են մտել ՀՀ Սահմանադրության 1-3 գլուխները:

Ելնելով վերոշարադրյալից եւ ղեկավարվելով «Սահմանադրական դատարանի մասին» ՀՀ օրենքի 32-րդ հոդվածի 1-ին, 6-րդ կետերով, ինչպես նաև 69-րդ հոդվածի 7-րդ մասով` ՀՀ սահմանադրական դատարանի թիվ 1 դատական կազմը

**Ո Ր Ո Շ Ե Ց .**

«ՎՏԲ-Հայաստան Բանկ» ՓԲԸ-ի անհատական դիմումով գործի քննության ընդունումը մերժել:

Նախագահող`

Անդամներ`